



*Sabtu, 26 Desember 2020*

**Ogen: Lukas 2:16-20**



**“NDAHI JESUS TUBUH”**



Lit sekalak diberu sierbinaga roti tiap berngi. Berngi ngenca erbinaga, sabab suari ia erban roti. Teptep berngi keliling ia ku sekelewet inganna tading. Emaka sekali paksa i bas tanggal 24 berngi tupung ia erbinaga roti, ibegina me lonceng gerejal. Seh kel riaha ukurna megi sora lonceng e. Seh ia rumah, nggo ertekad ia i bas berngi si pagi berngi natal, la atena erbinaga roti gelah banci ia ku gereja. Tapi, sinik ia kentisik, i ukurina ka, adi ia la erbinaga, la lit senna guna nukur panganna ras bahan rotina, sabab keuntungan roti tiap wari cukup terjeng nukur nakan guna wari si pepagi rikut ras bahan roti. Emaka rukur ia, belinen sora pusuhna nuruh ia ku gereja erwari natal asangken erbinaga. Iputuskenna i bas berngi natal e, reh ku gereja. I bas wari natal e cirem kel ia, meriah kel ukuran banci erwari natal amin gia la ietehna uga kerna penukur bahan rotina i bas wari si pepagi. Kenca dung kebaktin natal, lit aksi natal, imomoken me bas gereja e, maka lit lua natal man kalak sierbinaga keliling i seputaren daerah e. Paksa isuruh ku lebe, ikut me ia. Seh kel ia senggetna, sabab pengurus gereja mereken amplop si cukup tebal. Seh ia rumah, ibukana amplopna ras sen si cukup melala i bas amplop e. Tangis ia, ertoto ia ngataken bujur man Dibata.

Malam natal, eme berngi si istimewa, i ja Jesus e tubuh man banta kerina. Ketubuhenna jadi sada berita si meriah, sinambari kegeluhenta si kote enda. Ketubuhen Jesus e terberita ku sebelang-belang doni. Seh pe man sierbinaga roti si nadingken dahinna guna ndahi Jesus si tubuh e. Lanai iukurina kerna erta doni sirusur jadi perayakenna.

Penungkunenna man banta, uga nge caranta ndahi Jesus si tubuh e? Mari enda jadi perenungen man banta sekalak-sekalak. Lukas 2:16-20 enda nuriken kerna permakan si reh ndahi ketubuhen Jesus. Selamat natal man banta.

*"Mari sidahi Jesus, gundari."*